



Un niuru Pridenti

**Ah si fussi ancora vivu / ddru poviru Kunta Kinti
pinsassi sicuramenti / li miricani su fora di menti
m'arrubbaru ncatinatu / ni la ma bella terra natìa
ma ora c'è ma fratieddru / ca ni lu munnu spatulìa.**

**Appiru a passari seculi scurusi / fatti di lacrimi e sangu
trattati comu armali d'appagnu / comu pueri ni lu fangu
non essiri umani ma schiavi / di li patru e di lu travagliu
matina nsira li rini rutti / e custringiti sempri a lu stagliu.**

**Ni li caffè nun si putìa tràsiri / si eranu pi li bianchi
li bus a cediri lu puestu / anchi si eranu muerti stanchi.
Quanti niuri furunu ammazzati / pi pridicari diritti e paci
Luther King, Malcom X / sunnu certu, ora cchiù filici.**

**Chi fussi chissu lu primu passu / versu la libertà di tutti
li valura di giustizia, paci / accuminciassiru a dari frutti.
Sientu azzidruna / pi chiddru ca pò succediri dumani
doppu anni di lotta / la spranza è ora ni li nostri mani.**

**La spranza ca lu munnu / possa accussì cangiari
na nova e vera dimucrazia / putiri ora spirimintari.
Dicivanu li granni pinsatura / l'uemini su tutti uguali
tocca a tia Barak Obama / mintiri in pratica chisti ideali.**

Caniatti Nuviemmru 2008

Indice poesie: <http://www.solfano.it/treppiedi/index.html>

Pagina principale: <http://www.solfano.it>